

Kaarata yowambeela ya Pawulo yoomulebela Timoteyo

Madhu oovolwana

Murumiwi Pawulo alebile kaarata ela muwari mwa yaaka ya 64 ofiyedha 67 Kirixtu agabaliwe. Timoteyo aali muKirixtu muzombwe a oAziya, maaye aali muZhudewu mbwenye babe aali muGerego. Pawulo ahimuthukula wi amveelele va moolendo aaye ni omukamihedha mabasa oolaleya.

Voomulebela kaarata ela, Pawulo afuna omuwaraaliha mwa dhoosuuziha dhimohi dhooratha dhedho dhaviriganiha gerezha. Athu amohi ootaganyiha tthottho dha eZhudewu ni dhimohi dha ode, yeera elabo ya vati wona mukaleliiwamo sootakala, kavili muthu onaavulumuwe aahisuuza tthottho dhimohi dhowiipiteya, ni ohara mikalelo dhimohi wona othuga dhooja dhimohi ni dhimohi ni ohiya otela. Pawulo onoveleela teto magano mmatugumanoni mwa malobelo, dha meeddihelelo a gerezha, makalelo oofuneya a asogoleli. Onomwaddela teto wi oliyeene axixe okala murumiwi ooromeleya wa osogoleli waaye wowang'anela makuru maatene a Kirixtu.

Ogawanyeya wa kaarata

Madhu oolojela *1.1-2*.

Mwaakooddege anamasuuziha ooratha *1.3-20*.

Mukalelo wa aKirixtu *2.1 ofiyedha 3.13*.

Mwaha wa kaarata ela *3.14-16*.

Masuuziho ooratha *4.1-5*.

Owaraalihiwa wa Timoteyo *4.6-16*.

Muriihanenge mmohi ni mukwaaye *5.1 ofiyedha 6.2a*.

Dhoofuna dhabure, dhoofuna dhapama *6.2b-21*.

Madhu oolojela

1 ¹⁻² Wa we Timoteyo, mwaana aaga-aaga munroromeloni. Di miyo Pawulo, murumiwi a Yesu Kirixtu, wona mwaathongele Mulugu, Mvulumusi eehu ni Yesu Kirixtu, oli ojejihedha weehu.

Mulugu Baba ni Yesu Kirixtu Nabwiya eehu yuweeddiwele thagaraga, yuuvahe mahala ni murenddele mmurimani mwaawo.

Owaraale ni dhoosuuziha dhooratha

³Vamaruwiimi Gidhowaga oMasedoniya, gahuuloba wi ohale oEfe-so waahiihege athu amohiwa enasuuziha dhooholosa. ⁴Ehiye ohela mmurimani thalako dheebeweene ni osasanyedha mandina a makolo. Nda dhinowambeeliha ovaanyihana, kadhinasuuziha dha olamula wa Mulugu, mwa nrromelo. ⁵Waathonge ndala wi vikale odhivela wookumela mmurimani mowaakwanela, mmurimani moohukanna yego yooruniha ni nrromelo noohukanna epa meento. ⁶Athu amohi yahiihiya dila ela, oharaga madhu eebeweene, ofiyedha oholowa. ⁷Aliwa enofuna okala anamasuuziha a malamulo, mwa dhaatedhene kineewesesa ddi aliweneene dhinawogiiwa naari dhinafuniiwa okokomezwa.

⁸Nihinona wi Malamulo bapama, yatapuleliwa ni mukalelo wofwanelelela. ⁹Nnonaga teto wi malamulo kiheleliwe athu ooharihamo, mbwenye eheleliwe athu ooholowa, oohiiwelela, eheleliwe oothega, oohulobela wa Mulugu, athu owaapa ababiwa, ameewa ni athu amohi. ¹⁰Eheleliwe mwaha wa ale elemeelele ojeberuwe, alobwana oorarusana alobwana-ve, eheleliwe mapanga, athu ooratha, oolibela mooratha teto aatene owiirana dhoorunihiwa ni dhoosuuziha dha ebaribari. ¹¹Dhoosuuziha dhedhi dhinafwanyeya mMuseluni Wapama onawoga dha nthithimiho na Mulugu ooriiheya, oyene oliye mwiinya wagilogolelihiye.

Pawulo onomotamaala Mulugu mwaha wa thagaraga dhaaye

¹²Ginomotamaala Yesu Kirixtu, Nabwiya eehu, oyene ogivahile kopollo dha mabasa ala teto vogoona ororomeleya waaga ohugivaha mabasa oomwiimelela. ¹³Naari wale gamunyemulave, gimurabulihaga ni wiithukulela. Mbwenye Mulugu ahigeeddiwela thagaraga mwaha wi geerana moohunona, vowi gaali oohukanna nrromelo.^a ¹⁴Mahala a Nabwiya yahigikuthuwela mookwaranya, ahigivaha nrromelo ni odhivela dhedho dhinnihuna mwaha wowiiwanana ni Yesu Kirixtu. ¹⁵Ala bi madhu oororomeleya, oofwanelelela waarumeedhela ni murima waatene, Yesu Kirixtu adhiile vati vano wi aavulumuse athu oothega. Vano mwa aliwa miyo gili oothega ookwaranya. ¹⁶Mbwenye gaheeddiweliwa thaga-

^a 1.12-13 Moone Meerelo a Arumiwi 8.3; 9.1,2,15.

raga, mwaha wa Yesu Kirixtu, naari ngalive oothega ookwaranya ndala, oonihe olevelela waaye waatewene wi gikale nifwanafwaniho nowaavileliha athu aatene, enaadhe emuroromele wi yaakele egumi yoohumala. ¹⁷Wa Mwene amalabweene, oohukwa, oohooneya, oyene oliye yeeka dili Mulugu, okale nriho ni nthithimiho okala ni okala. Ameni.

Madhu mamohi a Pawulo oomulaga Timoteyo

¹⁸We Timoteyo, mwaanaga, ginowuulamulela nda mooligana ni dhedho anamavuhulela dhawogiliwa wale dha we. Madhu ayene yuukamihedhe owana koddo yapama, ¹⁹oganna nrromelo teto ni murima wowogoowa. Amohi kayewelege vevale mirima dheewa dhaarunihiiwa, mowindo nrromelo neewa nahinoongeya. ²⁰Mwa ayene mmohi di Heminewu, mmohiwa Alixandere, athu ayene gihaapeleka wa Sathana wi esuuzehimunyemulege Mulugu mwabure.^b

Mitugumano dha malobelo

2 ¹Vowambeela wa malamulo ala maatene ginowuulobani wi voolobela okalege malobelo oolobelelana ni waalobelela athu, vamohi ni matthetheelo. Elobeleliwege athu aatene. ²Mwaalobelege mamwene ni aatene alene eli ni othongi wi nikale ni egumi yoopwaasa ni yamurenddele, nimuthithimihege Mulugu mwa dhaatedhene ni oriihedha. ³Nda sapama ni dhoohagalasa vameentoni va Mulugu, Mvulumusi eehu. ⁴Oliye onafuna athu aatene evulumuwe, enone ebaribari.

- ⁵Vowi Mulugu oli mmohi baahi,
ni namaandaniha mmohi vaari va Mulugu ni athu,
muthu ole nnamwiiriihu Yesu Kirixtu.
- ⁶ Oliye ahiivelela okala namobola a athu aatene.
Ola onamoona mwa mudhidhi wofwanelela.

⁷Mwa ela ohugisakula wi gikale namalaleya aaye teto murumiwi, owasuuziha athu a malogo mamohi madhu a nrromelo ni ebaribari. Kaginooratha, eehi, ginawoga ebaribari.^c

⁸Ginofuna alobwana volobela egwelihege madada vili vaatevene, ekelege oweela mirima ni oohutakaleliwa, naari ookangana.

⁹Emodha-modhave teto ahiyana yiwomihedhege ni mukalelo woothithimiheya mwa tthottho ni dhoowara dhoofwanelela. Ehiwomihedhege ni mathithi owiira waaluwa moowaatthabwiha, naari ni dhoowiwomihedhana dha oro. Ehiwomihedhege ni osanga, naari ni dhoowara dhookwima.

¹⁰Yiwomihedhege ni meerelo apama wona moofwanelela ahiyana ayene

^b 1.20 Moone Timoteyo a Nabiili 4.14 ^c 2.7 Moone Meerelo a Arumiwi 9.15

eneera wi boomutamaala Mulugu. ¹¹Ahiyana vosuuzihiwa ekalege oomaa-
la ni murima wowiiyeviha. ¹²Kaginarumeedha wi mwihiyana asuuzihege
naari okala ni othongi va alobwana akalege oomaala. ¹³Sowi Adamu
dambeele opaddusiwa vooharela Eva.^d ¹⁴Adamu kaanyengethiwe mbwenye
mwihiyana danyengethiwe, okala ohiiwelela.^e ¹⁵Mowindala mwihiyana
onoodha avulumusiwe mowaabala ahima, akalave munroromeloni, moodhi-
vela, akalave moweela ni moofwanelela.

Asogoleli a mugerezha

3 ¹Ala bi madhu oororomeleya a ebaribari eneeriwa: “Akala
muthu onofuna mabasa owaang'anela gerezha, ohufuna mabasa
oothukuwa”. ²Owaang'anela gerezha akalege muthu oohukanna yowa-
nganyedhiwana, akale mulobwana a mwihiyana mmohi baahi, akale
owiiruniha, a moobuwelelo a tthottho, anriiho, oowawaakela aleddo ni
owaakwaniha osuuziha pama. ³Kakale namalezela, kakale oowaniha,
mbwenye oopwaasa, oohukangana ni athu, ni oohudhiveliwa korowa.
⁴Akale oonona weeddiha murla waaye pama ni waalela anaaye pama wi
ekale owiiwelela ni anriiho ebaribareene. ⁵Akala muthu kanonile weeddi-
ha pama murla waaye, ki onahiddeele gerezha ya Mulugu addi? ⁶Ahikale
muthu oothwaruwa dhiino-dhiino mugerezha, woova wi oneethukulege
ni omorela mmusapani mwa Sathana ni othongiwa wona mwemo Satha-
na mwathongeliwiye. ⁷Weenjhedha, vevo akale muthu owi ni oodeene
enomuriha wi onanyemuliwege ni omorela mmusapani wa Sathana.

Arumiwi a gerezha

⁸Emodha-modhave ni maddiyakoni: ekale owiirana dha epogo, oohuwoga-
mo wiinddi-wiinddi, oohukala oolemelela dhoolezeliha, oohudhiveliwa
bure mpurelo wa korowa. ⁹Ekale athu a murima woohukanna yego yowaa-
runiha voologolela ebaribari ya nrromelo nenddo Mulugu naavuhuleliye.
¹⁰Ala teto yambeelee wehiwa, vano vooharela, akala kinna dhoohiyana
ethukule osogoleli wa orumiwi. ¹¹Emodha-modhave teto ahiyana ekalege
owiirana dha epogo, ehikale oorabwe, oonona ni oororomeleya mwa dhaate-
dhene. ¹²Maddiyakoni ekalege a mwihiyana mmohi baahi. Ekalege owaalela
aniiwa pama, oweeddiha teto pama mirala dheewa. ¹³Vale athu oohidda
mabasa owiimelela mowaakwanela pama, enoofwanya bili yapama ni oliba
murima voowoga ebaribari vovi nrromelo neewa nili mwa Yesu Kirixtu.

Dha wipiini dhuulubale

¹⁴Veva ginoolebeliimi dhedhi, ginojejihedha odha ofiya owaninyu
wewo mowaaguva. ¹⁵Mbwenye garibeliwa dhedho giwogiliimi dhino-

^d 2.13 Moone Wambeela 1.27; 2.7,22 ^e 2.14 Moone Wambeela 3.6,13

wuunoniha dha mwemo athu munafwaneleliwa okala mmuralani mwa Mulugu, eyene eli gerezha ya Mulugu a egumi ni mulongothi wootibeliha ebaribari. ¹⁶Moohaanganyedha, yawipiini ya yoweebedha yeehu si elubale:

“Oliye ahooneyela agali ni mwiili wa emuthu,
Muneba Woweela wahimwiirela onamoona wi dooharihomo,
angero yahimoono,
ahilaleyiwa vaari va athu a malogo maatene,
athu a mwiilaboni yaatene ya vati yahimuroromela,
Oliye ahithukuliwa odhowa odhulu mu nthithimiho”.^f

Anamasuuziha oonyengetha

4 ¹Muneba Woweela onowoga mowiiweya wi mwa malabo oomariha, athu amohi enoodha ehiye omuroromela Kirixtu. Enoodha yiiwelelege mineba dhoonyengetha ni dhoosuuziha dhodheela mwa mineba dhootakala. ²Dhoosuuziha dhedhi dhinakumela mwa onyengetha wa athu ooratha, ayene mmurimani mweewa eli okweene wona mpahiwe ni mugogo wa munddo. ³Enowaahiiha athu otela, waathongaga otadha dhooja. Dhedho Mulugu dhapaddusiliye wi ejege moomutthetheela, ayene enamuroromela ni onona ebaribari.^g ⁴Ebaribareene dhaatedhene Mulugu dhipaddusiliye sapama, kavili yego yowi muthu atadhege, aakelelaga moomutthetheela,^h ⁵Dhinoweelihiwa ni madhu a Mulugu ni malobelo.

Mwiimeleli apama a Yesu Kirixtu

⁶Wawaaddelaga dhedhi aKirixtu akwaawo, oneere okala mwiimeleli apama a Yesu Kirixtu, ooleliwa ni madhu a nrromelo ni dhoosuuziha dha ebaribari dhinahariwe. ⁷Thalako dheebeweene, dhoomunyemula Mulugu orabelege. Wiilibihe ni olemelela omuriiha Mulugu. ⁸Olemeleliha dha mwiili onapurihamo vang'ono, mbwenye egumi yolemeleliha omuriiha Mulugu enopuriha dhaatedhene. Onororomeliha egumi ela vano teto egumi yoosogolo. ⁹Ala bi madhu oororomeleya oofwanelelela waarumeedhela ni murima waatene. ¹⁰Va mwaha olena nnohidda mabasa mooliba ni weeseesa okwaranya, sowi yoojehedha yeehu eli wa Mulugu eegumi. Oyene oli Mvulumusi a athu aatene, tthabwa-tthabwa oomuroromela Kirixtu.

¹¹Waalumulege ni waasuuziha dhedhi. ¹²Muthu ahuuvevuse mwaha wovoona wi oli muzombwe, mbwenye okale nifwanafwaniho mwa

^f 3.16 Moone Maruku 16.19; Meerelo a Arumiwi 1.9 ^g 4.3 Moone Wambeela 9.3

^h 4.4 Moone Wambeela 1.31; Meerelo a Arumiwi 10.15

aKirixtu aatene mwa madhu aawo, meeddelo aawo, odhivela waawo, nrromelo ni moweela. ¹³Ofiyedha gidhe, wiiregena mwa ntidi waweelen-gela athu madhu a Mulugu, waalaleyela ni waasuuziha. ¹⁴Ohunyemule mvahi wa mahala oli mwa weevo. Waakeliwe odheela mmadhuni oorelihiwa vowuhela madada apogo.ⁱ ¹⁵Wiiregena mabasa ala moohariha ni wiiveleela, athu aatene eneere yoone wi egumi yaawo ya onamaang'anela enowunnuwa. ¹⁶Wiing'anelege okala wa egumi yaawo osasanyedhaga dhinasuuzihiiwe. Odidele dhedho. Weeragana dhedho onowiivulumusa weevo, vamohi ni ayene enoovuruwana.

Dhoolaga dhimohi

5 ¹Muthu pogweene kumusumululege moomunyanyuwela, mbwenye wiirege omwaaddela wona ababo. Azombwe wiirege wawaaddela wona addibilo ²Ahiyana apogweene wiirege wawaaddela wona amaayo, anamwali wiirege wawaaddela wona arogoriyo, moweela mwaatemwene.

³Waarihege ahiyana amaamukwele, ayene eli amaamukwele a ebaribari. ⁴Maamukwele winna ahima naari adhule, ayene esuuze omuthithimiha Mulugu vaade veewa ni waawelihedha ayene yaabalile. Vameentoni va Mulugu, mabasa ala eli owaakeliwa. ⁵Maamukwele a ebaribari, oohukanna mmohi oomukamihedha, oyene ohelile yoojijhedha yaaye wa Mulugu, onolobela moohuyedhedha mutana ni mahiyu wi Mulugu amukamihedhege. ⁶Mbwenye mma maamukwele oneehagalaliha ni dha vati vano, naari agali mugumi, oli ookweene. ⁷Waalamulelege dhego dhedhi wi ekalege oohukanna muladdu. ⁸Akala muthu kanaakameela amudhi aaye, tthabwa-tthabwa a mmuralani mwaaye mwemo, oyene ohuthathila nrromelo naaye, otakala waaye pookwaranya wa muthu oohuroromeleya.

⁹Maamukwele ahirumeedhihiwe ovolowa mulixtani na nikuru na ahiyana ahinaakwanihe yaaka makumi matanu nammohi (60). Akale owi ateliwege ni mulobwana mmohi, ¹⁰oononeya ni meerelo apama. Akale wi ahaalela anaaye pama, oowawaakela aleddo pama, oowaahabiha manyalo athu oweela mirima, owaakamihedha athu yaali mugoyini. Akale teto mma owiiveleela wiirana meerelo maatene apama.

¹¹Mbwenye ahiyana amaamukwele a yaaka vang'ono ohaataganyihedhege waaleba munikuruni nddi. Vale dhoofuna dheewa dhambeela, enaafunege dhooteliwa, omwihiya Kirixtu. ¹²Vevo enofwanyeya egathegile, mwaha woohulogolela yoororomeliha yeewa yowambeela yeeriliwana. ¹³Weenjehedha nda, enolemelela woonaga okala, mowindo enaakalelege weddedda mmavade mwa athu. Vano teto kineeddelege ebeweene, eneerege waaba evolowelaga dhaanya, ewoga-

ⁱ 4.14 Moone Meerelo a Arumiwi 6.6; 8.17

ga dhoohufwanelela owogiwa. ¹⁴Mowindala ginowuulaga wi ahiyana amaamukwele a yaaka vang'ono eteliwege, yaabalege ahima, yeeddihege pama mirala dheewa wi amwiiddani eehu nihaavahe mwaha wonaabana. ¹⁵Amohi yahiholowa ebaribareene omuharaga Sathana.

¹⁶Mwihiyana muKirixtu akanna anaamudhi amaamukwele aakamihedhege oliye, dhoorusa nda ahinyemelihe gerezha. Mowinda gerezha eneerege waanda waakamihedha amaamukwele oohukanna owaakamihedha.

¹⁷Apogo a gerezha oosogolela pama, ekale oofwanelela waariha mookwaranya, tthabwa-tthabwa ayene enahidda mabasa oolaleya madhu a Mulugu ni osuuziha. ¹⁸Vale Dhoolebiwa dhini, “Ng'ombe enambubudda tirigu, kumage vamulomoni”. Vamohiviwa dhini, “Namalaba doofwanelela waakela yoolivela yaaye”.^j ¹⁹Madhu oomwaaba mpogo a gerezha ohurumeedhege, vaahikala anamooni abiili naari araaru.^k ²⁰Oodidela othega waasumululege vameentoni va aatene wi amohiwa teto yoovege. ²¹Vameentoni va Mulugu, vameentoni va Yesu Kirixtu ni vameentoni va angero aatene, guhuulamula wi oharege malamulo alena mowogoo-wa. Ohaakulelege mwaha ohiiwale pama, kawiiirena yego moosakula. ²²Kawaaguvelege omuhela madada muthu. Mowindala kurumeedhele yoothega ya athu amohi, ologolele weela wa murima waawo pama.

²³Ohiye ong'waga mahinjeve mwaha woobulelana mbaani wiinddi-wiinddi omung'wege vinyu vang'ono.

²⁴Sowi dhoothega dha amohi dhinowooneya voweela kuwoge wene muladdu dheewa, mbwenye amohi dhoothega dheewa enanona vasogoloviwa vamawogelo muladdu baahi. ²⁵Emodha-modhave teto meerelo apama enowooneyela voweela, ale ehinooneya kinaakale oologoheya mudhidhi dhaatedhene.

6 ¹Ayene eli mfingwini ya odhaari yawoonege anabwiya eewa wona oofwanelela. Yawiiirelege nriho mwiibaribarini wi athu enaanyemulege ndina na Mulugu ni dhedho dhinasuuzihiihu. ²Ayene yinna anabwiya eewa aKirixtu, kayaavevusege vowoona wi oddibila ni orogora. Moohiyaniha, yawiimelelege mookwaranya, vowi aliwa enokamihedheya ni mabasa eewa, naaliweene teto bi aKirixtu oodhivela.

Dhoosuuziha dhooratha ni dhooreela dha ebaribari

Waasuuzihege ni waalaleyela dhego dhedhi. ³Weera omfwanya muthu onasuuziha dhoohiyana ni dhedhi, oohurumeedha ebaribari ya madhu a Nabwiya Yesu Kirixtu ni dhoosuuziha dhowiiwanana ni egumi yoomuriiha Mulugu, ⁴muthu owinda dowiithukulela ni oogaya, oohunonelamo yego. Mmurimani

^j 5.18 Deteronomiyo 25.4; Luka 10.7; Matewuzhi 10.10; AKorintu Owambeela 9.9

^k 5.19 Moone Deteronomiyo 17.6; 19.15

mwaaye doobulela, oofunesesa ovaanya ni okangana mwa madhu eebeweene. Dhedhi dhinodhiha wiiddana, ohiiwanana, wiinkedhana, wuubuwelelana dhabure, ⁵dhinodhiha ozhihana mirima woohuyiedhedha vaari va athu ayene tthotho dheewa dhihinoongeya vano kinaakwaniha odidela ebaribari. Aliwa enoobuwela wi omweebedha Mulugu si dila yoofwanyela mpurelo.

⁶Ebaribareene, omweebedha Mulugu onopuriha vajinji, akala muthu onohagalala ni dhedho dhinniiyena. ⁷Nivolowaga mwiilaboni ela ya vati kanathukulile yego, naakumagamo kannaakwanihe othukula yego. ⁸Nakalana dhooja ni dhoowara, dhinaakwanele dhedhi. ⁹Mbwenye ale oofuna oreela, enomorela moweewani, enomagiwa mmusapani wa dhoofuna dhijinji dhoodhowa ni dhoonoonga. Dhifunelo ndo dhino-waabwiniha orimeela mowoopiha. ¹⁰Nipara na dhootakala dhaatedhene fudhiveliwa korowa. Mwaha woosilila korowa amohi yahiiholosa, yahihya dila ya nrromelo, yahiiyata ni dhoovoreya dhijinji.

Koddo yapama ya nrromelo

¹¹We, muthu a Mulugu, dhaatedhene dhedhi othawe. Okalegena muri-ma woosayela oharishamo, woomuriha Mulugu, ooromeleya. Okalegena murima woodhivela, wa ntidi ni woopwaasa. ¹²Owanenge koddo yapama ya nrromelo. Ohiddeele egumi yoohumala yiithaneliwiiwe ni Mulugu, yasorihi-liiwe vameentoni va anamoona ajinji. ¹³Vameentoni va Mulugu oyene onavaha egumi dhego dhaatedhene ni vameentoni va Yesu Kirixtu eemelile awogaga pama vameentoni va Pontiyo Pilatu, ginowuulamula wi: ¹⁴Oharihe nlamulo ndda moohuthega ni moothithimiheya ofiyedha nlabo nowooneya Nabwiya eehu Yesu Kirixtu. ¹⁵Wooneya wewo oneeriiwena ni Mulugu mwa mudhidi wofwanelela. Oliye di oothithimiheya, onalamula. Mwene a amamwene Nabwiya a anabwiya. ¹⁶Oliye dihinakwa, onakala mowaara woohaddameleya, kalivo muthu aabihilege omoona naari onaande omoona. Wa oliye okale nthithimiho ni kopololo dhoohumala Amenii.

AKirixtu ooreela

¹⁷Athu ayene eli ooreela mwa dhego dha vati vano, waalamulege wi ehigayege naari oromela yooreela eyene ehinanoneya wona yoologela. Mbwenye emuroromelege Mulugu oyene onanivaha dhaatedhene wi niha-galalege. ¹⁸Waalamulege wi yiiregena dhapama wi ekalege ooreela mwa meerelo apama, oofeewa mada, oodhiveliwa ogawana ni oohukanna. ¹⁹Ndala enoodha edhuugelele dhooreela dhoodhiva ni dhoologela dhedho dhinoodha dhaakamihedhe osogolo wi yaakele egumi eli ya ebaribari.

Madhu oogomihedha

²⁰We Timoteyo, dhedho dhoologolelihiisu, ologolele pama. Orabele-ge dhoothapanya dhoohukamihedha yego, dhoomunyemula Mulugu teto

moobuwelelo oohiyana-hiyana, enadheela mmadhuni yiiraga si tthottho dhihili tthottho. ²¹ Athu amohi, mwaha woorumeedhela tthottho dhoonyengetha dhowindo, yahiholowa othathila nrromelo neewa. Mahala a Mulugu ekale ni nyo.